

欽  
定  
全  
唐  
文

欽定全唐文卷三十二目錄

元宗 十三

飭敬祀社稷詔

答中書門下表賀河西大破吐蕃詔

頒重注孝經詔

兩京告享各擇吉日詔

遣使分祀嶽瀆詔

誅柳升詔

以今文繕寫尚書詔

恤曠騎詔

貶韓朝宗吳興郡別駕員外詔

許上柱國外有餘勲迴授周親詔

答皇太子等表賀內道場靈異手詔

答中書門下賀元元皇帝靈應手詔

答陳希烈奏道士蕭從一見元元皇帝手詔

定祀元元皇帝儀注詔

引見諸州高蹈不仕舉人詔

尊道德南華經詔

改波斯寺爲大秦寺詔

定犯徒配軍詔

答請宣示瑞鹿詔

遣使巡按天下詔

禁弋獵詔

停不急之務詔

量減祭祀應用牛牲詔

增定祀典詔

許百官旬節休假不入朝詔

禁流貶人在路逗留詔

貶韋堅並免從坐詔

刊廣濟方詔

黜陟守令詔

貶王琚江華郡司馬詔

詳定來年廟享及南郊合祀儀注詔

頒示道德經注孝經疏詔

禁採捕詔

流彭果詔

令正月夜開坊市門詔

賜楊慎矜等自盡併處置詔

賜故邠王男承宣等緋魚袋詔

答百僚表請加應道尊號手詔

遣使祭嶽瀆四海詔

却王公等請上尊號詔

却羣臣上尊號手詔

答李林甫等請頒示賜太子仁孝詩詔

停封西嶽詔

勅吏部慎重注擬詔

致祭涇渭灞澮等水詔

答馮紹正賀雨手詔

禁刈禾充馬藁詔

禁貸店干利詔

勅冀州刺史原復邊仙觀修齋詔

欽定全唐文卷三十二

元宗 十三

飭敬祀社稷詔

社爲九土之尊，稷乃五穀之長。春祈秋報，祀典是尊。而天下郡邑所置社稷，等如聞祭事或不備禮，苟崇敬有虧，豈靈祇所降，欲望和氣豐年，焉可致也。朕永惟典故，務在潔誠，俾官吏盡心，庶蒼生蒙福。自今已後，應祭官等庶事宜倍加精潔，以副朕意。其社壇側近，仍禁樵牧，至如百姓私社，宜與官社同日致祭。

金史卷之三十三  
答中書門下表賀河西大破吐蕃詔

坐運奇謀誠難與戰河西捷書相繼謂之伐叛可豫圖之  
所請者依

頒重注孝經詔

化人成俗率繇於德本移忠教敬實在於孝經朕思暢微  
言以理天下先爲注釋尋亦頒行猶恐至蹟難明羣疑未  
盡近更探討因而筆削兼爲敘述以究源流將發明於大  
順庶開悟於來學宜付所司頒示中外

兩京告享各擇吉日詔

朕肅承宗祀不敢怠違誠有未安夙夜祗惕頃時有事於太廟兩京同日告享雖虔卜吉辰俱遵上日而義深如在禮或有乖自今以後兩京宜各別擇吉日告享

遣使分祀嶽瀆詔

務農勸穡雖因於天道人和歲稔實賴於神庥頃者春夏之交稍愆時雨收穫之際復屬秋霖慮害農功每祈孚祐遂得百神降福羣望效靈既不爲災仍多善熟幽贊之德普洽於生人昭報之儀式遵於祀典宜令太子詹事嗣許王瓘祭東嶽光祿卿嗣鄭王希言祭中嶽宗正卿濮陽郡

王徹祭西嶽少府監李知柔祭南嶽衛尉卿嗣吳王祗祭  
淮瀆光祿少卿彭果祭河瀆所司擇日錄奏其名山大川  
有路近處亦合便祭僻遠處委所繇長官備禮致祭務陳  
蠲潔以達精誠

誅柳外詔

朕恭守丕業臨照百官冀君臣一心中外勵節長安縣令  
柳外往因推薦寔彼周行而乃稟性回邪恣情聚斂黷於  
貨賄紊我紀綱是而可容孰不可赦故令鞠按用致嚴刑  
豈惟懲息姦源抑欲庶寮知戒況聞朝廷卿士多與交遊

比之匪人門通賂遺用宏寬典咸爲匿瑕且古人以廉恥  
立名清白貽範苟虧斯節謂忝前修況身荷恩榮家享重  
祿陳力無紀徇財已彰取愧素餐自投踈網每念於此良  
用憮然凡在百寮宜爲殷鑒仍宣示中外令知朕懷

以今文繕寫尚書詔

朕欽惟載籍討論墳典以爲先王令範莫越於唐虞上古  
遺書實稱於訓誥雖百篇奧義前代或亡而六體奇文舊  
規猶在但以古先所制有異於當今傳寫浸訛轉疑於後  
學永言刊革必在從宜尚書應是古體文字並依今字繕

金匱要略卷之三十一  
寫施行永念典謨無乖於古訓庶遵簡易有益於將來其  
舊本仍藏之書府

恤曠騎詔

育物者所貴於從宜養人者必資於遂性況加疾苦豈忘  
哀矜內外廂三衛曠騎等如聞因當上染患者番滿之後  
既不勝皆致還鄉又不容在職掌將息進退無據何所依  
投溝壑是憂宜謀朝夕永言及此深軫於懷自今已後如  
有此色宜移就三衛廚給食料將養各委左右金吾將軍  
存意檢校所須藥物仍與太常計會量事供擬並差醫人

救療其諸門及街鋪職掌人等各移就本衛將養所須食料各委將軍以當衛諸色迴殘官物等且量事支給其醫藥宜準內外廂例自餘諸色當番人等有痰疾者並準此處分其死者各委所由隨事埋瘞當日牒報本貫令家人親族運致還鄉

貶韓朝宗吳興郡別駕員外詔

高平郡太守上柱國長山縣開國伯韓朝宗頃承榮獎擢在神京輒薦凶人超登赤縣果彰貪穢大獲贓私舉非允當已有比周之責使之交易更涉嫌疑之地頗招物議實

素朝章宜從貶黜用申懲戒可吳興郡別駕員外置

許上柱國外有餘勲迴授周親詔

頃敘功勞累增勲級上柱國外許及周親是謂賞延載榮  
宗族迴充賜物用厚朝恩其準格上柱國外有餘勲迴授  
周親

答皇太子等表賀內道場靈異手詔

頃以獻歲親祠百靈豈精至上昭而禎祥之屢應神言  
報休徵之慶黃素飛雲漢之間皆宗社降靈福流寰宇豈  
予微感獨能致之所請宣示朝廷光於史冊者依

答中書門下賀元元皇帝靈應手詔

朕精修道源爲人祈福雖則每多昭應未若此之殊祥豈  
聖祖揆予之無私靈真貺我之誠感遂得休徵之應出自  
神言勤請之詞上飛空境永惟虛薄何以當茲然福逮蒼  
生深爲慰也所請者依

答陳希烈奏道士蕭從一見元元皇帝手詔

纘承丕業遵修元訓精誠之至冀在希夷寡昧之德寧期  
昭應恭惟聖祖屢降真容仙衛接於雲間飈駕迴於天路  
又賜以無疆之壽且欣以助成之言嚴奉神休良深祇慶

所請者依

定祀元元皇帝儀注詔

尊祖奉先必在於崇敬辨儀正禮所貴於緣情伏以大聖  
祖元元皇帝御氣昇天長生久視體重元而不測與元化  
以無窮真容屢現寶符仍集恭惟孚祐實表常存比太清  
宮行事官皆具冕服爰及奏樂未易舊名并告獻之時仍  
陳筮祝既非事生之禮豈是降仙之儀且真俗殊倫幽明  
異數理有非便亦在從宜自今後每於太清宮行禮官宜  
改用朝服兼停祝版其告獻辭及所奏樂章朕當別自修

撰仍令所司具儀注奏聞

引見諸州高蹈不仕舉人詔

君子之道所以正心志全貞吉也逸人之學所以勵天下  
激浮躁也朕每崇先訓以道化人思致棲貞之士用先咸  
在之列是以頻降東帛冀空巖藪虛懷式竚明發不忘卿  
等來應辟命遠致城闕周文多士旣叶於旁求虞舜疇咨  
亦在於僉議爰命臺省詢於道業或善行無跡名實難窺  
或大器晚成春秋尚富津涯未測輪奐何施事且隔於行  
藏道以分於出處其馬曾常廣心賀蘭迪等三人宜待後

處分崔從一王允貽韓宣胡祭趙元獎等五人年鬢旣高  
稍宜優異宜各賜綠衣一副物二十段餘并賜十段不奪  
隱淪之志以成高尚之美並宜坐食訖好去仍依前給公  
乘還郡

尊道德南華經詔

王者天其祖學者父其師義有尊崇情歸孝敬況我元宗  
道要無名象先猶龍莫測昔嘗問禮烹鮮有論歷代攸尊  
永惟重元衆教之父者也朕纘承聖緒祇服元言乙夜觀  
書將求於道雖理歸絕學信無取於筌蹄然垂代作程義

必存乎文字俾之大順亦合禮經其墳籍中有載元元皇帝南華等真人猶稱舊號者並宜改正其餘編錄經義等書亦宜以道德經列諸經之首其南華經等不須編在子書仍即令集賢院審詳改定應舊號并科目訖具宣付所司仍頒示中外

改波斯寺爲大秦寺詔

波斯經教出自大秦傳習而來久行中國爰初建寺因以爲名將欲示人必修其本其兩京波斯寺宜改爲大秦寺天下諸府郡者亦宜準此

定犯徒配軍詔

刑之所設將以閑邪法不在嚴貴於知禁朕自臨萬國向踰三紀思宏至道之化實務好生之德比者應犯極法皆令免死配流所以市無刑人獄無冤繫哀矜勿喜冀洽於生靈大小以情寧忘於鑒寐至於徒罪雖非重刑力役之外不免拘繫載罹寒暑誠可矜量自今以後其犯罪應合徒者並宜配諸軍効力庶感激之士因以成功寬大之恩叶於在宥且本置杖罪是代肉刑將以矜人非惟重法今官吏決罰或有任情因茲致斃深可哀憫其犯杖罪情非

巨蠹者量事亦令効力宜令所司作載限仍立條例處分  
答請宣示瑞鹿詔

宮苑之內屢薦嘉祥今又縞質霜毛變林虞之獸族殊姿  
馴性實雲駕之龍媒允謂休徵用爲慰也所請者依

遣使巡按天下詔

黜幽陟明所以察風俗求瘼恤隱所以慰黎蒸不有其人  
孰可將命禮部尚書席豫等亮直清節經通大才多識前  
言備閑時政或久膺任使嘗參八使之列或夙蘊公忠必  
副四方之委永懷兆庶用寄澄清豫巡河北道鉉巡京畿

關內及河東道隱之巡東畿及河南道見素巡山南東道  
江南西道黔中嶺南等道麟巡河西隴西磧西等道翹巡  
劔南及山南西道光譽巡淮南及江南東道其百姓之間  
及官吏之輩如事或未該須有釐革者仍委量事處置回  
日奏聞其嶺南黔中磧西途路遙遠若使臣一一自到慮  
有稽遲任各精擇判官準舊例分往

禁弋獵詔

永言亭育仁慈爲本況乎春令義叶發生其天下弋獵採  
捕宜明舉舊章嚴加禁斷宣布中外令知朕意

停不急之務詔

今土膏旣動農事將興丁壯就功不可妨奪其不急之務一切並停

量減祭祀應用牛牲詔

祭祀之典犧牲所備將有達於虔誠蓋不資於廣殺況牛之爲畜人實有賴旣功施播種亦力被車輿自此餘牲尤可矜憫况前聖有作難爲盡廢明神克享亦在深仁自今以後每大祭祀應用駢犢宜令所司量減其數仍永爲常

式

增定祀典詔

皇王之典聿循於百代郊祭之義允屬於三靈聖人既因時以制宜王者亦緣情以革禮朕丕承寶運肅遵明禋曷嘗不克己齋心虔恭夙夜猶慮舊章或闕誠敬未孚有一於此良深祇畏且尊莫大於天地祭莫大於祖宗嚴配昭升豈宜異數今蒸嘗之獻既著於常式南北之郊未展於時享粢盛且略對越何申自今已後每載四時孟月先擇吉日祭上帝其以皇地祇合祭以次日祭九宮壇皆令宰臣行禮奠祭務從蠲潔稱朕意焉祭神如在傳諸古訓以

多爲貴著自禮經腓脛之儀蓋昔賢之尚質甘旨之品亦  
孝子之盡誠旣切因心方資變禮其已後享太廟宜料外  
每室加常食一牙盤仍令所司務盡豐潔發生振蟄雷爲  
其始畫卦陳象威物效靈氣實本於陰陽功乃施於動植  
今雨師風伯久列常祠唯此震雷未登羣望已後每祀雨  
師宜以雷神同祭朕承宗廟之福爲人神之主事有未暢  
義在得中庶寅畏之誠上達於郊廟祈禳之典載收於闕  
遺凡在有司各揚所職倍宜恭肅以叶靈心

許百官旬節休假不入朝詔

百工允釐彰乎奉職五日休澣義在優閒方貴無爲之風  
以宏多暇之政朕欽崇至道思致和平今寢寓克寧朝廷  
無事將欲叶於淳古豈惟臻於小康當與羣寮暢茲娛樂  
頃旬遊宴賞已放入朝節假常參未數後命公私叶慶千  
載一時上下同歡自中及外自今已後每至旬節休假中  
書門下及百官並不須入朝外官等其日亦不須衙集

禁流貶人在路逗留詔

應流貶人皆負罪譴其中或捨其昧死全彼餘生將寬常  
法示有懲戒如聞在路多作逗留郡縣阿容許其停滯是

何道理自今已後其左降官量情狀稍重者馳十驛已上  
赴任流移人令押領綱典畫時遞相分付如更因循尚有  
寬縱所繇當別有處分

貶韋堅並免從坐詔

書曰無總貨寶生生自庸傳曰官之失德寵賂章也則古  
先哲王不聞好貨垂以明戒無易紀律然法貴變通罰宜  
平典罪止其惡過從寬宥庶乎有勸冀乎有懲韋堅是司  
潭漕妄事興易餉遺朝廷計其積贓數目甚廣朕以衣冠  
之士豈往求之而姦回之人是爲抑與韋堅已別有處分

所司一切不問咸令自新冀有廉隅成予德化各思變節  
無貳過焉宣示中外知朕此意

刊廣濟方詔

朕頃所撰廣濟方救人疾患頒行已久計傳習亦多猶慮  
單貧之家未能繕寫閭閻之內或有不知倘醫療失時因  
致橫天性命之際寧忘惻隱宜令郡縣長官就廣濟方中  
逐要者於大板上件錄當村坊要路榜示仍委採訪使勾  
當無令脫錯

黜陟守令詔

朕憂彼黎元寄之牧宰嘗慮授任非當撫字乖方頃所以設舉親之科廣得賢之路爰初詣闕亦旣明試以言及乎從政必欲深考其實懸之賞罰要以始終近日分遣使臣因之巡察善惡之驗事旣足明懲勸之端言斯可復其楊懋等七人黜陟使並奏清狀宜與改轉其所舉主六品已下付所司準此處分五品已下各賜一上下考李連等八人旣奏善狀除已改官者至選日各減三兩選仍稍優與處分一中上考趙愷等六人俱犯贓私除已流貶者自餘並速準律科斷其舉主各量犯者罪狀輕重咸從貶黜仍

宣示中外咸使知悉

貶王琚江華郡司馬詔

琚久經任使歷典藩條恃朝廷之見寬冒憲法而無憚凡所莅職罕著善聲自頃移官益彰喧訟志由貪敗政以賄成所犯贓私動盈千計正名論罪合寘流刑宥過推恩宜從貶任可江華郡司馬員外置

詳定來年廟享及南郊合祀儀注詔

孝享宗廟所以達思誠也格於神祇所以崇嚴敬也則祈穀上帝春祀先王永惟因心敢忘如在朕承累聖之丕業

應上元之福佑聿修柴瘞虔奉蒸嘗常慮備物未豐馨香  
莫達頃以詳諸舊典創以新儀清廟陳牲特加於常餼昊  
天冬祭重增以時享庶乎罄齊敬之勤叶殷薦之義況履  
茲霜露載感惟深瞻彼郊壇有懷昭事念禮歸通變諒期  
乎達誠教在率先必貴乎親奠宜以來載正月朕親謁太  
廟便於南郊合祭仍令中書門下即與禮官詳定儀注擇  
日奏聞興言拜獻先深祗感凡百有司各供爾職

頒示道德經注孝經疏詔

道爲理本孝實天經將闡教以化人必深究於微旨朕欽

承聖訓覃思元宗頃改道德經載字爲哉仍隸屬上句及  
乎議定衆以爲然遂錯綜真詮因成注解又孝經舊疏雖  
粗發明幽晦探蹟無遺猶未能備今敷暢以廣闕文且妙  
本逾元微言久絕或怡然獨得或參以諸家庶宏聖哲之  
規用叶君親之義仍令集賢院具寫送付所司頒示中外

### 禁採捕詔

今屬陽和布氣蠢物懷生在於含養必期遂性如聞滎陽  
僕射陂陳留郡蓬池等採捕極多傷害甚廣因循旣久深  
謂不然自今已後特宜禁斷各委所由長官嚴加捉搦輒

有違犯者白身決六十仍罰重役官人具名錄奏當別處分其僕射陂仍改爲廣仁陂蓬池改爲福源池庶宏大道之仁以廣中孚之化

流彭果詔

嶺南五府經略採訪使光祿少卿兼南海郡太守攝御史中丞彭果頃者擢以非次鎮彼方隅不能慎守名簡克副朝寄而乃貪恠匪極求欲無厭官吏恣其侵漁蒼生受其塗炭醜聲轉露穢迹彌彰及令推窮並自招伏計其贓數十萬有餘議以常科法當殊死但尚寬典免致嚴誅宜從

杖罰俾徙荒徼即就大理寺門決六十除名長流湊溪郡  
仍即差使馳驛領送至彼捉搦勿許東西

令正月夜開坊市門詔

重門夜開以達陽氣羣司朝晏樂在時和屬此上元當修  
齋籙其於賞會必備輦輶比來因循稍將非便自今已後  
每至正月改取十七十八十九日夜開坊市門仍永爲常  
式

賜楊慎矜等自盡併處置詔

左道亂常邦家所禁兇謀逆節天地不容戶部侍郎兼御

史中丞楊慎矜潛蓄回邪率由艱險猥承門緒得齒朝行爰自卑微謬加超擢寄之帑藏總彼均輸殊不知外矯清廉內懷貪冒趨趨百變以此徇身首鼠萬端專爲罔上觸途苛刻歸怨國家還俗僧史敬忠兇慝逆徒狂愚賤品乃妄陳讖緯別覲異圖密與交通將期委質仍自以亡國之後克復攸歸遂乃手記災祥窺覲時變言肆惡悖心在不臣惡跡旣彰款驗咸服戴天履地面目何施梟首夷宗未云塞責但以務宏大體志在寬刑尚免嚴誅容其自斃其楊慎矜宜賜自盡其兄少府少監慎餘弟洛陽令慎名等

不合隨從並爲同惡亦宜令自盡其史敬忠首建逆謀實爲巨蠹宜決重杖一百鮮于賁詐稱敬忠當王附會兇人宜決重杖六十長流其范滔妄說妖言與之昵狎宜決六十長流嶺南臨江郡其王庭耀旣爲傭作終不論告宜決四十配隸黔中郡楊慎矜外甥前通事舍人辛景湊引致非類成此禍端宜決四十配流嶺南晉康郡其義陽郡司馬嗣虢王巨雖則不涉凶謀終與敬忠相識宜解却官於南賓郡安置其太府少卿張瑄素以妄庸專行險詖比緣慎矜薦引驟厯班榮因此結交潛爲黨援況犯贓私情逾

難恕宜決六十長流嶺南臨封郡其右威衛執戟天馬監副監万俟承暉妄蓄圖書與慎矜解說潛相黨附爲蠹實深宜決重杖六十其閑殿使殿中監韋衢忝膺重寄不存公道受慎矜囑請爲承暉奏官諂黷愈彰比周斯在宜貶與遠官應配流及安置人等所在即差綱驛領送其楊慎矜及兄弟并史敬忠有莊宅等宜并官收其家口男女等並令所司準法即配流嶺南諸郡其張瑄及万俟承暉鮮于賁等男女并一房家口亦準此配流嶺南其内外近親不可尚列班榮及居京輅宜令三司使即括實奏聞且臣

金定全月五 卷三二二  
之事君有死無二匹夫徇義猶或亡軀豈有位亞六卿任  
兼三獨父子相續俱承重委兄弟不次皆列通班而更陰  
圖不軌潛覲異望靜言此心良可歎息除惡務本與衆共  
之令在惟行蓋非獲已中外寮庶咸使聞知

賜故邠王男承宣等緋魚袋詔

故邠王男承宣等地惟戚屬器表溫良伯仲輝光溫溫有  
裕推恩之典旣叶於分官賜服之榮宜崇於寵命

答百僚表請加應道尊號手詔

禎祥者所以合天人鴻名者所以彰德業今封章繼至誠

請甚勤敬膺神休允答人望宜依來請

遣使祭岳瀆四海詔

朕肅恭明祀祈福上元冀敷佑於黎蒸將昭報於靈應頃  
蠻夷款附萬里廓清稼穡豐穰羣方樂業豈惟菲德以致  
元和實賴神休永綏景貺思崇望秩用展虔誠宜令宗正  
卿襄信郡王璆等即分往五嶽四瀆及四海致祭所經道  
次有名山大川亦便致祭務令精意以稱朕懷

却王公等請上尊號詔

朕欲使人述日用道遠親譽願行其心永守沖約未允來

請宜識此懷

却羣臣上尊號手詔

朕觀上古人主惟稱帝王一字秦漢以來乃兼皇帝朕以薄德嗣守寶位乾乾惕厲懼不克勝豈自崇飾以招譴咎雖迫公卿之請終負平生之心所請加尊號甚無謂也

答李林甫等請頒示太子仁孝詩詔

詩者志之所之也將以道達性情宣揚教義耳朕承五聖之業萬方之寄主鬯叶於神心元良貞於國本美其克踐仁孝恭修友睦深慰於懷不覺形之諷詠今請具寫六章

頒示中外兼編諸簡策以傳不朽亦欲自家刑國以訓人  
倫宜依來請

停封西嶽詔

自春以來頗憊時雨登封告禪情所未遑所封西嶽宜停  
勅吏部慎重注擬詔

吏部取人必限書判且文學政事本自異科求備一人百  
中無一況古來良宰豈必文人又限循資尤難獎擢自今  
以後簡擇縣令但才堪政理方圓取人不得限以書判及  
循資格注擬諸畿望緊上中每等爲一甲委中書門下察

問選擇堪任者然後奏授大理評事其朝要子弟中庸未  
歷望畿縣便授此官既不授文又未經事自今以後有此  
色及朝要至親並不得注擬

致祭涇渭灞澮等水詔

五材並用時表上靈八水分流實稱善利京師奧壤秦甸  
王畿灞澮通於涇渭澇澗匯於澧澇蓄洩雷雨滋育稼穡  
雖惠澤已及於蒸民而虔誠猶闕於祀典聿崇精享庶達  
明神其涇渭灞澮等分水宜令禮儀使左庶子韋述取今  
月二十九日一時備禮致祭務陳蠲潔稱朕意焉

答馮紹正賀雨手詔

黍稷垂成實滋甘澤旣屬久旱懷憂匪寧思拯黎元靡神  
不禱靈心昭鑒降此休徵覩垂穎之可觀佇大穫之爲慶  
編之青史良有愧焉

禁刈禾充馬藁詔

農爲政本食乃人天必禾稼之及期遂京坻之厚積是以  
愛人存乎重穀勤政在乎厚生俗之所資何急於此如聞  
遠近每至秋中穀禾熟時即賣充馬藁苟求規利之心殊  
害生成之性靜言斯弊實資懲革自今以後不得更然其

三京及天下諸郡並委所繇長官嚴加捉搦如非成熟不得輒刈犯者量決四十仍榜示要路咸使聞知

禁賃店干利詔

南北衛百官等如聞昭應縣兩市及近場處廣造店鋪出賃與人干利商賈莫甚於此自今已後其所賃店鋪每間月估不得過五百文其清資官準法不可置者容其出賣如有違犯具名錄奏

敕冀州刺史原復邊仙觀修齋詔

朕承唐運遠襲元元載宏道流遂有靈應彼之女道丹臺

真人白日上昇五雲在御不圖好道遂有明徵深爲喜慰  
卿舊相之子家上元元能叶心志自茲目視果成朕願雖  
上清云遠而舊相猶存遼海雖別於千年緱山復期於七  
日窈冥響像故亦依然今因奏使迴便付少物卿可於觀  
所宜修齋行道以達朕意也卿能至誠必有通感然道之  
爲政本貴無爲宜用乃心化彼黎庶

欽定全唐文卷三十三目錄

元宗 十四

許百官遊宴詔

諸衛隊仗緋色幡改赤黃色詔

答中書門下賀大同殿鐘鳴手詔

答中書門下賀寫道德經五本手詔

答中書門下賀宮內柑子結實詔

禮神用真玉詔

以李林甫兼領朔方節度詔

令文武選人對衆留放詔

禁官奪百姓口分永業田詔

賜王鉷自盡詔

禁戰功虛冒詔

贈聶師道詔

令御史宣撫河東諸郡詔

削李林甫官秩詔

嚴考課詔

命陳希烈兼領祕書詔

授安慶緒衛尉卿詔

諭嶺南州縣聽應諸色鄉貢舉詔

禁弋獵採捕詔

平糶詔

遣官祭天地五星詔

展諸軍士防秋年限詔

遣官祭元冥風伯雨師詔

報祭岳瀆詔

貶吉溫詔

親征安祿山詔

命皇太子監國仍親總師徒東討詔

命皇太子即皇帝位詔

命羣臣輔嗣皇帝詔

欽定全唐文卷三十三

元宗 十四

許百官遊宴詔

百辟叶心交修皇極所以天降休命寶祚維新今郊廟精  
禋大禮克舉萬方無事九有忻心屬獻歲芳春上元望日  
既當行慶之序式廣在鎬之恩自今後非惟旬休及節假  
百官等曹務無事之後任追遊宴樂

諸衛隊仗緋色幡改赤黃色詔

三王繼統質文既不相襲五德承時服色遵於所尚至於

旗常改制駢翰異宜所以表軍國之容合聲名之度事之大者安可因循而已焉國家膺樞紐之期纂黃中之歷憲章垂範運旣屬於維新旗幟同色義必在於革故頃者俯納羣議式明統緒故得天人致和風雨時若豈朕躬菲德克廣睿圖實累聖鴻休允膺景運稽古之大旣有昭明文物所資理宜詳正其諸衛應隊仗所用緋色幡等並改爲赤黃色庶克遵於通變諒有叶於從宜其諸節度使并管內軍使等亦宜準此

答中書門下賀大同殿鐘鳴手詔

朕齋心大同緬覲真蹟豈精誠遠感而休應薦臻今九華  
之鐘三清徹響聲聞金石氣含虛無是知紫宸之宮雲輶  
降集青童之府烟景來遊將合律於雲璈表同和於陰則  
靈仙坐接福壽昭然永惟嘉祥良深慶慰所請依

答中書門下賀寫道德經五本手詔

朕躬承丕業稟訓元宗霜露永懷感思罔極伏以三清設  
教五聖在天克奉先靈同心薦福今玉版瓊章傳之洞府  
雲囊縹帙列在仙宗庶以展永慕之心兼以播淳風之化  
編於簡冊實用愧焉

答中書門下賀宮內柑子結實詔

枳橘之性惟任土不遷陰陽之和實在感能致且寒谷吹  
律猶氣變燕郊則中樞化源故物備京邑今黃柑數株丹  
實盈條裊露迎風香逾江劍金光珠澤秀溢林庭豈斯果  
之足珍喜元和之必應故合天道信何遠焉所賀已知仍  
依來請

禮神用眞玉詔

禮神以玉者蓋取其精潔表心溫潤合德爲器有象正辭  
乃信以達馨香其在珪璧頃來禮神六器及宗廟奠玉自

馮紹正奏後有司並用珉禮所謂君子貴玉而賤珉不可用也朕精禋郊壇嚴敬宗廟奉惟新之祚庇太平之人則人力普存備物以享安可以珉代玉惜費事神況國家之祈福有萬方之助祭闕典必修無文咸秩豈於天地宗廟奠玉有虧自今已後乾坤六器宗廟奠玉並用眞玉諸祀用珉如以玉難得大者寧小其制度以取其眞

以李林甫兼領朔方節度詔

經邦論道允屬於賢才保大定功聿求於長策不有兼領孰張寵賢開府儀同三司行尚書左僕射兼右相崇元館

大學士集賢院學士太清太微宮使修國史上柱國晉國  
公林甫器惟國楨材乃人範文標楷式學究精微沃啟之  
誠罄嘉猷於造膝清貞之節盡公心於匪躬自登於三事  
式是百辟具瞻惟允茂緒居多任總廟堂既贊雍熙之化  
智高帷幄更資決勝之謀宜因公輔之重兼受元戎之寄  
可兼安北副大都督持節朔方節度關內支度營田鹽池  
押諸蕃部落副大使知節度事六城水運節度管內軍郡  
採訪處置等使餘並如故

令文武選人對衆留放詔

政理之源實惟選士銓綜之道必在至公比來文武選人  
調集者及於留放末日引通甄鑒匪周或紀綱不一以資  
取舍詎免流言須議事以制法亦因時而革弊自今已後  
吏部選人宜審定格限頒示令集銓之日各量官資書判  
狀迹功優據闕合留對衆便定豈惟免淹時日抑亦共表  
公平見收者旣無溢外被放者亦當斂分則自近及遠以  
絕倖求其有宏詞博學或書判特優超越流輩者不過限  
以選數聽集其武部選人試日較等功優亦對衆便從留  
放仍永爲常式並作條件處分

禁官奪百姓口分永業田詔

周有均土之宜漢存墾田之法將欲明其經界定其等威  
食祿之家無廣擅於山澤貿遷之伍罕爭利於農收則歲  
有豐穰人無胥怨永言致理何莫繇茲如聞王公百官及  
富豪之家比置莊田恣行吞併莫懼章程借荒者皆有熟  
田因之侵奪置牧者惟指山谷不限多少爰及口分永業  
違法賣買或改籍書或云典貼致令百姓無處安置乃別  
停客戶使其佃食既奪居人之業實生浮惰之端遠近皆  
然因循亦久不有釐革爲弊慮深其王公百官勲蔭等家

應置莊田不得踰於式令仍更從寬典務使宏通其有同籍周菴以上親俱有勲蔭者每人占地頃畝任其累計某蔭外有餘如舊是無勲蔭地合賣者先用錢買得不可官收限勅到百日內容其轉賣其先不合蔭又蔭外請射兼借荒及無馬置牧地之內并從合蔭者並不在占限官還主其口分永業地先合買賣若有主來理者其地雖經除附不限載月近遠宜並却還至於價值準格並不合酬備既緣先已用錢審勘責其有契驗可憑特宜官爲出錢還其買人其地若無主論理不須收奪庶使人皆撫實地悉

無遺百姓知復於田疇蔭家不失其價值此而或隱罪必無容又兩京去城五百里內不合置牧地地內熟田仍不得過五頃已上十頃已下其有餘者仰官收應緣括簡共給授田地等並委郡縣長官及本判官錄事相知勾當並特給復業並無籍貫浮逃人仍據丁口量地好惡均平給授便與編附仍放當載租庸如給未盡明立簿帳且官收租佃不得輒給官人親識工商富豪兼併之家如有妄請受者先決一頓然後準法科罪不在官當蔭贖有能糾告者地入糾人各令採訪使按覆具狀聞奏使司不糾察與

郡縣官同罪自今已後更不得違法買賣口分永業田及諸射兼借公私荒廢地無馬妄請牧田併潛停客戶有官者私營農如輒有違犯無官者決杖四十有官者錄奏取處分又郡縣官人多有任所寄莊言念貧弱慮有侵損先已定者不可改移自今已後一切禁斷今所括地授田務欲優矜百姓不得妨奪致有勞損客戶人無使驚擾緣酬地價值出官錢支科之間必資總統仍令兩京出納使楊國忠充使都勾當條件處置凡在士庶宜悉朕心

賜王鉷自盡詔

人臣無將有必誅之義王制所禁在難捨之刑銀青光祿大夫御史大夫兼京兆尹殿中監閑廐使隴右羣牧監使及天下戶口色役和市和糴坊作園苑長春宮栽接并京畿及關內採訪等使鉞性本兇愎行惟艱險徒以早膺擢用累踐崇班持憲尹京委重斯大八閑六尚寵寄惟深殊不知外飾公忠干冒非據內懷奸詐包藏不測任海川狂愚不逞妖惑無良而乃潛與通情仍希非望及覺彰露便令滅口韋會聞此事跡話於私庭遽令追掩殞於縣獄邢緯久懷逆謀專搆惡黨其弟錡始終結約常與交通託云

弟職其由已令神明所殛兇黨伏辜縱刑且踈欲逃其罰然天地雖廣何所容身宜賜自盡戶部郎中王錡蓄積梟獍之心包藏狂悖之計與逆人邢緯久託深交供其資糧同爲兇惡自申款暱十載於茲所有逆謀咸供謀畫此而不罰其若法何猶寬殊死之典俾從杖刑之責宜於朝堂集衆杖殺

禁戰功虛冒詔

王者制軍詰禁師旅惟貞飲至勞旋賞罰必信易曰在師中吉承天寵也傳曰賞不失勞俾人勸也若躡前典何以

化成諸軍節度使等委任尤重雖奉謀受律去則捷歸而甄賞敘勲率多非實且爲君者以信御下爲臣者以忠奉上信不可失忠不可虧朕保而行之庶能激勵且往前立功皆令簡覆至於敘錄亦委別人朕以將者國之腹心朝之方嶽舍此不任誰則竭誠所以每一立功咸委錄敘推心之道斯亦極矣近來諸軍滋弊尤甚乃至奏蕃中事意爰及破敵錄功觸類憑虛皆非撫實或久在行陣反被棄遺或不踐軍戎虛霑爵賞銀章紫綬無汗馬之勞厚錄崇班皆親援而致使戰士失望僥倖競馳靜言其繇實在於

此且古者士農異處軍國殊容所以國學上庠以教胄子  
撰車表貉用訓戎師豈有家襲弓裘身參卒伍斯乃假名  
取進其理昭然皆因主將有私遂乃公行囑託已往之過  
朕亦不言將來自新必期革弊自今已後朝要並監軍中  
使子弟一切不得將行先在軍者亦即勒還破敵敘功事  
歸案實且虛妄事君覲冒行惠不懼於法不畏於神凡在  
庶僚亦宜自戒宣示中外令知此懷

贈聶師道詔

詢諸贈典繫乃彝章啟有厥由於何不舉淮浙宣歙管內

道門威儀逍遙大師問政先生爲國焚修大德賜紫聶師  
道早通元理夙契真風野鶴不羣孤雲自在昔太祖創基  
之際已命焚修及元勲匡國之初早曾瞻敬眷言道行實  
冠元關雖昇遐屢歷於光陰而遺懿益隆於寰宇况教門  
一請台輔奏陳且將啟元墟即迴故里是用加之峻秩錫  
以崇階式表休恩庶昭往行可贈銀青光祿大夫鴻臚卿  
問政先生

令御史宣撫河東諸郡詔

河東及河淮間諸郡去載微有滂損至於乏絕已令給糧

如聞郡縣尚未調恤方春在候農事將興或慮百姓艱難未能存濟宜每道各令御史一人即往宣撫應有不支持者與所繇計會隨事賑給如當郡無食及不充聽取比郡者分付務令勝致以副朕懷

削李林甫官秩詔

爲臣之道貳則有辟事君之致將而必誅故左僕射兼右相吏部尚書上柱國晉國公贈太尉廣陵大都督李林甫爰因宗室獎以班序逮履清貫尤持矯飾鄙誠患失狡迹多端朕待以勿疑任當殊重恩私踰分崇高至極乘據樞

衡二十餘載豈知外表廉慎內懷兇險籌謀不軌覬覦非  
望昵比庸細譖害忠良悖德反經師心蘊慝禍福生於喜  
怒榮辱由其愛憎使縉紳箝口行路側目淫祀夜禱於神  
祇厭勝家崇於蠱道尊空養素實繁有徒旣畢禴禳旋勦  
其命阿布思振降塞上委於綏緝敢行交結輸竭深衷嚴  
室焚香要之誓信指期撤警縱以叛離且肆犬羊之羣侵  
軼我疆場方申犄角之契圖危我宗社可隱之狀所不忍  
言以親黨薦引咸歸闕子息蕃多曾無教誨貪叨納賄依  
倚成奸閱牆屢聞敗官相次作偽滋久晚節頗彰含垢在

予猶示宏蔽鬼得誅而溢盡惡布露而難容逮從訊鞠事  
皆昭著殲夷噍類曷足懲愆鞭斲屍棺未云責塞但以常  
經任使特寬恒典其在身所有官秩並追除削俾同凡庶  
許其殞掩男前將作監岫率由下劣不承闕勗驕恣越度  
過失彌深且配流嶺南及黔中延德郡前司儲郎中粵配  
流蒼梧郡前太常少卿嶼配流臨封郡仍並除名即綱馳  
驛領送自餘男有官者令所司即勘會亦除名各配流嶺  
南及黔中送惡郡女在室并男未有官者取其情願任隨  
兄弟朕念其驅策尚懷仁恕旣貸生成之恩赦其殞嗣之

金史卷之三十三  
三十三  
罰仍每房各乞奴婢三兩人并與緣身衣服糧食使其存  
濟自餘資產一切官收男孫有官者解却無官者勒隨父  
并家口並續遞途流所至捉搦勿許東西縱會恩赦不在  
量移之限其林甫男女妻等有罪非妄惟其子壻諫議大  
夫楊齊瑄覩其不善尋有薄闕跡異同惡頗申誠款并自  
餘至親應合累者續有處分噫堯謂達聰四凶在列周稱  
盛德三監俶擾知人之美誠愧前言明罰斯加非無累歎  
凡任咸自誠焉

嚴考課詔

循名責實所以激羣吏也懲惡勸善所以務至公也苟黜陟之非當何考課之足徵其内外文武官員外同正員并判試不釐務者既無別效兼有多年比來因循或與進考據額既標節限緣此遂多踰越致令課最者見棄無功者獲升獎勸之門殊非允當自今已後並不在進考之例其内外官初效亦不在與限臺省官考各委長官比類才能功課褒升不得一例申送俾僥競息心功能勵節

命陳希烈兼領祕書詔

國之載籍政之本源故藏於蓬山緘以芸閣者以爲義府

之代暮三五以還皆率茲道也故每加求購冀補逸遺四  
部名目悉索而來七略條流兼該頗盡豈直羽陵之蠹簡  
汲冢之殘編如聞頃者以來不存勾當或詮次失序或鉤  
校涉踈或擅取借人或潛將入己因循斯久散失遂多思  
革前弊允資盛德宜令左相兼武部尚書陳希烈充監祕  
書令省圖書爰假丹青之餘以振鉛黃之美則金華侍講  
足繼寵於班伯石渠司籍方嗣徽於劉向至公之選可不  
務乎

授安慶緒衛尉卿詔

王者出師登壇擇將忠臣受任幹蠱成功則君賞其勤父  
成其訓名教斯在寵秩是崇銀青光祿大夫鴻臚卿員外  
置同正員兼廣陽郡太守同范陽節度副使上柱國柳城  
縣開國男安慶緒門傳忠孝之義庭稟韜鈴之略志氣剛  
決固敵是求遂使榆塞息警柳城罷鋒百勝深謀舉無遺  
策可旌上將之功用叶中行之吉可特進行衛尉卿兼廣  
陽太守餘如故

諭嶺南州縣聽應諸色鄉貢舉詔

如聞嶺南州縣近來頗習文儒自今已後其嶺南五府管

內白身有詞藻可稱者每至選補時任令應諸色鄉貢舉  
仍委去使準式考試有堪及第者具狀聞奏如有願赴京  
者亦聽其前資官并常選人等有詞理兼通才堪理務者  
亦任此選及授此官

禁弋獵採捕詔

陽和布氣庶類滋長助天育物須順發生宜令諸府郡至  
春末已後無得弋獵採捕嚴力禁斷必資杜絕

平糶詔

嘉穀不登古今薦有勸分之義皇王善經且豐熟以來歲

時頗久豈有餘糧棲畝誠恐極賤傷農所以積之京坻用防水旱爰自二載稍異有年粟麥之間或聞未贍比開倉賤糶以濟時須雖且得支持而價未全減餽糧種子尚慮不充是用調恤俾之寬泰在於處置須均有無今更出倉務令家給俾其樂業式副朕心宜於太倉出糶一百萬石分付京兆府與諸縣糶每斗減於時價十文河南府畿縣出三十萬石太原府出三十萬石滎陽臨汝等郡各出粟二十萬石河內郡出米十萬石陝郡出米二萬石並每斗減時價十文糶與當處百姓應緣開場差官分配多少一

時各委府郡縣長官處置仍令採訪使各自勾當其太倉  
含嘉出粟兼令監倉使與府縣計會處分其奉先同官華  
原等縣與中部郡地近宜準諸縣例數便於中部請受其  
餘縣有司者仰準此其天下府縣百姓去載有損交不支  
濟者仰所繇審勘責除有倉糧之外仍便據籍地頃畝量  
與種子京兆府及華陽馮翊扶風等郡既是近輔須別優  
矜雖非損戶或有乏少種子者亦仰每鄉量宜準給并委  
採訪使與府縣長官計會即與處置使及營農使其種子  
既須好粟仍取新地稅分付京畿府郡京草雖已加價尚

聞難辦宜委度支各與所繇計會支料得至今載終已來用足之外應未送者量事停減賑給糶倉矜貧濟乏務從撫實無使隱欺如官人及富有之家典正并僦攬諸色輒私侵糶兼有乞取或虛著人名詐來請受者其自五品已上官蔭人等錄奏當別有處分六品已下并白身者便決一頓仍準法科繩所繇等官不能覺察及自抵犯者亦與同罪

遣官祭天地五星詔

關輔郡邑霈澤屢施京城在近時雨未降是用軫慮匪寧

於懷其諸郡壇雖已勤請攸資遍祭庶達誠心宜令吏部侍郎蔣烈今月二十五日祭天皇地祇給事中王維等分祭於五星壇務申虔潔以副朕懷

展諸軍士防秋年限詔

踐更之役固是循常限約之間必資通變雖載滿合替而處置隨時況已在軍中復諳戎務功名未遂何必往來其今載諸軍應文武士等宜並延留一載仍準式給賜式外更加賜物兩段

遣官祭元冥風伯兩師詔

近日以來時雨未降在於宿麥慮有所傷雖憂勤之心不忘於黎庶而精誠之至冀展於靈祇宜令太子太師陳希烈祭元冥光祿卿李愷祭風伯國子祭酒李麟祭雨師仍取今年二十三日各申誠請務令蠲潔如朕意焉

### 報祭岳瀆詔

朕永念蒸人祈穀上帝而陰陽式序風雨不愆今獲稼穡阜成允賴神明幽贊也頃者虔心精享已申昭告其五嶽四瀆及天下諸郡山川近令秋後展祭收穫既就農畝事隙報功咸秩抑惟其時宜令所在郡縣長官即擇良辰以



謫遐裔以戒庶寮可晉康郡端溪縣尉員外置長任所在  
馳驛發遣

親征安祿山詔

黃軒撫運既統蚩尤之旅炎漢應期亦有陳豨之伐雖德  
合仁覆或震雷霆之威功侔載物匪容原野之罪蓋所以  
除殘救暴伐罪恤人聖帝賢君孰能無此朕以菲薄纘承  
丕構乘時御宇慙繼統於百王盱食宵衣軫納隍於一物  
多歷年所億兆咸知安祿山本自細微擢之行伍進小忠  
而自售包巨猾以貪天予每含容冀其遷善列在衣冠之

右授之師旅之權賜予無涯邀求罔極凡經寵任中外畢  
聞今遂竊我干戈欺我將士妄宣密旨假託妖言人畏兇  
威苟從逼脅稱兵向闕殺掠無辜此而可原孰不可忍前  
所出師命將足以除兇去孽仍聞阻兵西路左次南轅朕  
義在救焚情存拯溺雖蟾蜍舉斧自當屠潰而蜂蠆有毒  
必藉討除今親總六師率衆百萬鋪敦元惡巡幸洛陽將  
以觀風因之掃殄太山壓卵未可喻其輕重洪波注瑩不  
暇收其光焰宜令所司即擇日進發其河西隴右朔方除  
先發番漢將士及守軍郡城堡之外自餘馬步軍將兵健

等一切並赴行營各委節度使統領仍限今月二十日齊到既緣剪除兇逆暫赴東京宮掖侍從並令減省至於供擬都無所須其扈從文武官及飛騎閑廐馬家并諸色人等應食公糧者並以官物支供仍從此身齋鍋幕緣路並不須置頓在於黎庶固免勞煩布告遐邇宜知朕意

命皇太子監國仍親總師徒東討詔

通三立極正維之業大明兩作離繼照之功博是以貞我萬國必在元良弼予一人歸之上嗣將寄丈人之律實資長子之師亦既戒嚴當除羣慝皇太子亨仁明植性孝友

因心稟上德之粹靈宅中和之正氣恭敬之虔豈伊橋梓  
剛柔之適無取韋絃韞公忠而事君總文武而行已旣不  
絕馳之美可稱問膳之勤以三善之明助百揆之務邇安  
遠肅天平地成屬兇險負恩稱兵向闕人神同憤命爾撫  
軍將徼福於宗祧以保安於社稷憑天之德何嚮不濟順  
人之心所戰必尅庶清彼氛沴以寧我國家宜令太子監  
國仍即親總師徒以誅叛逆取今月二十三日先發所司  
準式務從省便無使勞煩布告遐邇咸令知悉

命皇太子即皇帝位詔

元子亨睿哲聰明恪慎克孝才備文武量吞海嶽付之神  
器僉曰宜然今宗社未安國家多難宜令即皇帝位朕稱  
太上皇且天下兵權宜制在中夏朕據巴蜀應卒則難其  
四海軍權先取皇帝處分然後奏朕知待克復上京朕將  
凝神靜慮偃息大庭也

命羣臣輔嗣皇帝詔

皇帝自幼仁孝與諸子有異朕豈不知往十三年已有傳  
位之意屬其歲水旱左右勸朕且俟豐年爾來便屬祿山  
構逆方隅震擾未遂此心昨發馬嵬亦有處分今皇帝受

命朕心頓如釋負勞卿等遠去勉輔佐之多難興王自古  
皆有卿等乃心王室以宗社爲念早定中原吾之望也